

Poštujući UN Konvenciju o pravima djeteta, UN Smjernice za alternativno zbrinjavanje djece, a na osnovu člana 58a stav (1) Zakona o socijalnoj zaštiti, zaštiti civilnih žrtava rata i zaštiti porodice s djecom („Službene novine Kantona Sarajevo“, br. 38/2014 - prečišćen tekst, 38/2016, 44/2017, 28/2018, 52/2021 i 40/2022), Odluke Vlade Kantona Sarajevo broj: 02-04-44436-27/24 od 26.09.2024. godine, Odluke Vlade Kantona Sarajevo broj: 02-04-33336-45/23 od 20.07.2023.godine, kao i člana 6. Protokola o saradnji od 28.7.2023. godine, a koji se kod Ministarstva za rad, socijalnu politiku, raseljena lica i izbjeglice Kantona Sarajevo vodi pod brojem protokola 13-11-31627/23

Ministarstvo za rad, socijalnu politiku, raseljena lica i izbjeglice Kantona Sarajevo (u daljem tekstu Ministarstvo), ulica Reisa Džemaludina Čauševića broj 1., koje zastupa ministrica Enda Pavić Pečenković

i

Javna ustanova „Kantonalni centar za socijalni rad“ (U daljem tekstu: Kantonalni centar), ulica Gatačka broj 80, Sarajevo, koju zastupa v.d. direktora Draženka Osmanspahić

i

Predstavništvo strane humanitarne organizacije „SOS-Kinderdorf International“, sa sjedištem u Sarajevu (u daljem tekstu: SOS Dječija sela BiH), ulica Semira Frašte bb, koje zastupa nacionalni direktor Malik Garibija

U Sarajevu, 07.10.2024. godine potpisuju:

PROTOKOL O SARADNJI ZA SMJEŠTAJ MLADIH KOJI NAPUŠTAJU SISTEM JAVNE BRIGE

Član 1.

(Predmet Protokola)

- (1) Ovim Protokolom o saradnji definišu se prava i obaveze Ministarstva, Kantonalnog centra i SOS Dječija sela BiH (u daljem tekstu: Potpisnici).
- (2) Predmet ovog protokola je saradnja u oblasti smještaja mladih koji napuštaju sistem javne brige iz Kantona Sarajevo (u daljem tekstu: Protokol).
- (3) Smještaj će se pružati kroz uključenje u Program samostalnog življenja uz podršku za mlade punoljetne osobe čiji psihofizički razvoj i nivo funkcioniranja ne odstupaju značajnije od razvoja i odrastanja punoljetnih osoba iste životne dobi, odnosno mladih osoba koje mogu samostalno živjeti, a koje napuštaju sistem javne brige tj. koje su putem Kantonalnog centra kao djeca bez roditeljskog staranja, djeca čiji je razvoj ometen porodičnim prilikama ili iz drugog razloga bila smještena u hraniteljsku porodicu, ustanovu, instituciju ili drugu organizaciju sa kojom Kantonalni centar ima zaključen ugovor, memorandum ili protokol o saradnji (u daljem tekstu: Korisnik).
- (4) Ovim protokolom saradnju za smještaj i brigu o mladim osobama iz stava (2) ovog člana definišu Ministarstvo, Kantonalni centar i SOS Dječija sela BiH.

Član 2.

(Cilj Protokola)

Cilj protokola je unaprjeđenje saradnje u Kantonu Sarajevo u oblasti alternativnog smještaja mladih bez roditeljskog staranja u periodu kada napuštaju sistem javne brige zbog punoljetstva ili završetka školovanja, smještajem u SOS Dječija sela BiH i uključenjem u Program samostalnog življenja uz podršku.

Član 3.

(Program samostalnog življenja uz podršku)

- (1) SOS Dječija sela BiH će temeljem ovog Protokola razvijati i održavati Program samostalnog življenja uz podršku (u daljem tekstu: Program) osiguravajući prijem do 16 Korisnika godišnje. Izuzetno, uz pisanu saglasnost svih Potpisnika ovog Protokola, moguće je uključiti i veći broj Korisnika.
- (2) Program podrazumijeva od 6 do 12 mjeseci smještaja i podrške u Programu za Korisnike nakon što Kantonalni centar za njih utvrdi prestanak prava na smještaj u domu, instituciji, ustanovi, hraniteljskoj porodici ili drugom obliku alternativne brige.
- (3) U periodu smještaja i podrške za Korisnika u Programu SOS Dječija sela BiH će im omogućiti samostalan ili grupni boravak u stambenoj jedinici pri čemu će se osigurati najmanje 15 metara kvadratnih životnog prostora za svakog Korisnika, osnovni namještaj, kućanski aparati i drugi neophodni elementi za uslovan život i boravak. U slučaju grupnog boravka u istoj stambenoj jedinici ne može živjeti istovremeno više od 4 Korisnika.
- (4) SOS Dječija sela BiH će Korisnicima osigurati redovnu materijalnu pomoć u iznosu od najmanje 300 KM mjesečno za potrebe kupovine hrane, odjeće, obuće, higijenskih preparata i druge osnovne potrebe.
- (5) SOS Dječija sela BiH će svakom Korisniku osigurati stručnu osobu kao voditelja slučaja, sačiniti i voditi individualni plan razvoja s ciljem osamostaljenja mlade osobe, te u skladu sa vlastitim mogućnostima i kapacitetima osigurati druge vidove mentorske, psiho-socijalne i druge pomoći u cilju zapošljavanja, stabilizacije i osamostaljenja Korisnika.
- (6) SOS Dječija sela BiH se obavezuju da će u pogledu zaštite najboljeg interesa Korisnika usko saradivati i poštovati odluke Kantonalnog centra.
- (7) Ministarstvo i Kantonalni centar imaju pravo u svakom trenutku provesti stručni, finansijski ili pravni nadzor nad provođenjem Protokola i kvalitetom pružene usluge.
- (8) SOS Dječija sela BiH dužna su postupati u skladu sa nalazima provedenog nadzora i u razumnim rokovima otkloniti eventualne uočene nedostatke.

Član 4.

(Procedura smještaja i prijema u Program)

- (1) Pravo na smještaj i prijem Korisnika, dan početka i trajanje smještaja utvrđuje se Rješenjem Kantonalnog centra.
- (2) SOS Dječija sela BiH će po prijemu zahtjeva za smještaj i prijem u Program cijeniti pristiglu dokumentaciju i vlastite stručne i druge kapacitete mogućnosti prijema Korisnika, postojanja kontraindikacija, te u roku od 7 dana od dana prijema zahtjeva dostaviti odgovor Kantonalnom centru.

(3) Kantonalni centar će, u slučaju pozitivnog odgovora, rješenjem priznati pravo i uputiti na smještaj i prijem Korisnika u Program.

(4) Za svakog smještenog Korisnika, Kantonalni Centar, SOS Dječija sela BiH i Korisnik potpisuju tripartitni ugovor koji definiše međusobna prava i obaveze.

(5) Korisnik, Kantonalni centar ili SOS Dječija sela BiH mogu u svakom momentu zbog nemogućnosti izvršavanja ugovornih obaveza ili zbog kršenja odredbi ugovora iz stava (4) ovog člana pokrenuti postupak raskida ugovora s otkaznim rokom od 30 dana.

(6) U slučaju raskida ugovora iz stava (4) ovog člana, svaka ugovorna strana će bez odlaganja informisati ostale ugovorne strane o novonastalim okolnostima zbog kojih daljnji smještaj neće biti realizovan.

(7) U slučaju hitnog raskida ugovora iz stava (4) ovog člana bez otkaznog roka na pisani zahtjev SOS Dječijih sela BiH, SOS Dječija sela BiH će Korisniku isplatiti 1.000,00 KM (hiljadu konvertibilnih maraka) u svrhu podrške daljem samostalnom životu.

Član 5.

(Finansiranje usluge)

(1) Ministarstvo će za smještaj Korisnika i prijem u Program posredstvom Kantonalnog centra osigurati 1.000,00 KM (hiljadu konvertibilnih maraka) SOS Dječijim selima BiH mjesečno po smještenom Korisniku.

(2) Na ime troškova smještaja i uključenja Korisnika u Program, SOS Dječija sela BiH će redovno mjesečno, ispostavljati fakture Kantonalnom centru.

(3) SOS Dječija sela BiH će vlastitim naporima, od donacija i iz drugih izvora finansiranja, u skladu sa vlastitim mogućnostima, osigurati ostatak sredstava neophodnih za brigu o korisnicima.

(4) Isplate drugih naknada Korisnicima će se vršiti u skladu sa aktima Ministarstva i Kantonalnog centra i nisu predmet ovog Protokola.

Član 6.

(Rješavanje nesporazuma)

(1) Strane potpisnice Protokola će eventualne nesporazume nastojati riješiti u duhu dobre volje, a sve u najboljem interesu mladih koji napuštaju sistem javne brige i u svrhu postizanja njihove pune samostalnosti.

(2) Ukoliko nastali spor ne bude riješen sporazumno, isti će se rješavati pred Općinskim sudom u Sarajevu.

Član 7.

(Potpisivanje memoranduma sa Kantonalnim centrom)

U skladu sa članom 58a. stav (2) Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Kantona Sarajevo”, br. 38/2014 - prečišćen tekst, 38/2016, 44/2017, 28/2018, 52/2021 i 40/2022), a shodno ovom Protokolu, Kantonalni centar i SOS Dječija sela BiH moraju imati potpisan memorandum ili protokol o saradnji, u kojem su definisana međusobna prava i obaveze.

Član 8.

(Završne odredbe)

- (1) Protokol stupa na snagu danom potpisivanja, i primjenjuje se od 01.10.2024. godine do potpisivanja novog protokola.
- (2) Izmjene, dopune i raskid ovog Protokola vršit će se sporazumno između ugovornih strana.
- (3) Gramatička terminologija korištenja muškog i ženskog roda za pojmove u ovom Protokolu, uključuje oba roda.
- (4) Ovaj Protokol sačinjen je u 6 (šest) istovjetnih primjeraka od kojih svaka strana potpisnica zadržava 2 (dva) primjerka.

Ministarstvo za rad, socijalnu politiku,
raseljena lica i izbjeglice Kantona Sarajevo



Enda Pavić Pečenković, ministrica

MP Broj: 13-11-42861/24


Javna ustanova „Kantonalni centar za socijalni rad“



v.d. direktora Draženka Osmanspahić

MP Broj: 

Predstavništvo strane humanitarne organizacije
„SOS-Kinderdorf International“, sa sjedištem u Sarajevu



Malik Garibija, nacionalni direktor

MP Broj: 